

**MASƏLA AŇA WAKITÀ
UWANA POL
ATSETSÈR À AZLA
KORINTIYA
Deuxième Lettre de Paul aux
Corinthiens**

Ayyi

¹ Gi Pol uwana Zəzagəla akəsàni gi, kà gi aŇa magay masləlay aŇa Yesu Kristu kà, gi la uwana gətseter wakità uwanay la ahəl gulo, anu la deda gami Timotawus, à akul məna gay Zəzagəla uwana la Korintiya, ŋgaha à azlaməna masla madiŇal gəl à vok anik anik gesina, uwana la kutso Akayya la abà. ² Zəzagəla Baba gami, atà la Sufəl gami Yesu Kristu tapis akul gay à vok la mav à akul lapiya.

Zəzagəla adzərəd anu ala

³ Kikay à Zəzagəla Baba, la Yesu Kristu, Sufəl gami. Masla Baba aŇa vok mahamay, masla madzərədàh azladza ala koksikoksi la mataslaha atà ləv ala. ⁴ Amiyaka mədàgay la ŋgərpa mənğa la abà kà, masla kà adzərədàhanula koksikoksi. Kà uwaga à uwana məslala vok aŇa madzərədàh azladza anik uwana ala, atà la azlaŋgərpa anik anik la abà suwaŋ, mətəslatàla bokuba uwana anu məbəzəl la slaka Zəzagəla. ⁵ Aganay uwana gəpəh à akul: Kristu kà asà ŋgərpa kà mənğa, kiya uwaga anu babay kà,

məsa ɲgərpa mənɲa. La kità kà, Zəzagəla adzərədàhanula kaykay, kà uwana anu la maham gay à vok la Kristu la abà. ⁶ Baɲa məsa ɲgərpa kà, kà akul aɲa madzərədàh ala, ɲgaha Zəzagəla aɲa mabəl akul. Baɲa Zəzagəla adavà à anu mawad vok à uda kà, kà akul aɲa madzərədàh vok ala, kà akul aɲa mabas tsəhay ɲgərpa uwanay məsay. ⁷ Məsəl ndzer kà, akul la maday kokudà maruw vok à ahəɲ la tetəvi aɲa Zəzagəla la tsəh, ɲgaha mədahama à ɲgərpa à abà anina la slaka tekula, ama bà la uwaga bay kà, Zəzagəla adzərədàh akul ala bokuba anu suwan.

⁸ Azladedə, la kità bay kà, asa à anu kasəlaw lakəl aɲa tsəhay ɲgərpa, uwana məsà la kutso Asəya la abà. ɲgərpa uwatà kà, azà à anu haday, kà uwaga aga kà bokuba mənɲ dzəgla la kuda gami, ndzer, uwatà kà mədzugw kà mətəfay la abà aw. ⁹ La abatà mədzugw la ləv gami la tsəh kà mavakay gami adadəv à gay la abanay lakana, məgòd. Ama uwaga atàp à anu kà, kà anu aɲa maf madzugway gami à gəl gami à afik aw, ama kà anu aɲa maf madzugway gami kà à Zəzagəla uwana à afik, masla mawulla azladza à uda la mamətsay. ¹⁰ Kà uwana masla la uwana apəlla à anu ala la zlamtsa aɲa mamətsay zlazladaga la abà, ɲgaha bay kà, masla la uwana adàpəlla anu ala aya gotənaɲ. Ndzer, à masla la uwana adàpəlla anu ala. ¹¹ Akul kà, kadəzlakaw anu kiya uwaga, kà azladza aɲuvaw tadəv kudà kà anu, kiya uwaga kà, la mok uwana Zəzagəla adatsən madəv kudà uwaga kà: ‘Kikay’, azladza aɲuvaw, tadəgəfal,

kà vok mahamay aṅha uwana avà à azladza aṅuvaw.

Pol abəđla madzugway aṅha

¹² Madzugway aṅa ləv gami az sayda lakəl aṅa madz à ahəṅ gami la gudəṅ uwanay la vok, agay la ləv tekula la maduwal Yesu, ṅgaha ma baməraka la tataka aṅkul la abà zlà ma ay? La dziriga, uwana akəs Zəzagəla à gəl kà, mənəfa masəlay aṅa dza aw, say vok mahamay aṅa Zəzagəla uwana azlaka anu. ¹³⁻¹⁴ La haḍay gə, kà tatak mahadəṅ à ahəṅ gə la ahəṅ la matsetseray gami la abà aw, uwaga bokuba uwana kadzenaw pəra, amiyaka katsənawwan babay aw kà. Mədzugw kà, la huma la gay kà, kadətsənawwan lela gesina, bə uwana katsənawwan gəl gə gəl gə lagonay babay kà. Ama mok uwana Sufəl gami Yesu Kristu adàsa à wan kà, akul kadəsəlaw tatak gesina, ṅgaha kadàrabaw kà anu, bokuba anu uwana mədàrabay kà akul.

¹⁵⁻¹⁶ Haḍay la teraṅa kà, gəyàh mad à awtày à slaka aṅkul dadəṅ, ṅgaha kà gi aṅa mad à Makeduniya. Mok uwana gədàtsizlla ala la Makeduniya, naka gəwul à slaka aṅkul, kà aṅkul aṅa mazlak gi la mauguzahay gulo la abà, baməraka la mana beymi gesina, kà maday à kutso Yahudiya. Kiya uwaga kà, naka asik səla gəpis à slaka aṅkul, la abatà kà naka gəzlaka akul kà masəla. Ama gəbəzà à awtày aw. ¹⁷ Mok uwana gədzùgw uwaga, ma gədzùgw ma la haṅkəli gulo aw takay? Awma la paṅaw deyday, bokuba aṅa azladza gudəṅ à vok pəra takay? Awma 'Iyay', gəgod tsa 'Awan', tatak?

18 Ndzer kà, Zəzagəla kà, masla masəlay, masla dziriga. Uwana gəpəh à akul kà, 'Iyay' la baŋaw la 'Awan', gəpəh tatak la paŋaw səla kəla ay. 19 Yesu Kristu Kona aŋa Zəzagəla uwana məpəhakulla, Silas, Timotawus ŋgaha gi babay kà, 'Iyay', məgod, baŋaw 'Awan', aw, məgod aw, say 'Iyay' pəra. 20 Haday gə kà, masla aga 'Iyay', à Yesu uwana agəd à map à ahəŋ aŋa Zəzagəla à afik gesina. Tsa kità kà, la Yesu Kristu la uwana, 'Amen' məgoday, kà anu aŋa mazləb Zəzagəla. 21 Zəzagəla la gəl aŋha la uwana adzərədàhànula la tetəvi aŋa Yesu Kristu la tsəh, ŋgaha adzərədàhakulla babay, masla la gəl aŋha la uwana atsatsàmànì anu, abək anu à fəta à awtày, 22 kà anu magay azlaaŋha. Dadəŋ kà, avà à anu Masasəfok aŋha kà anu masəlay kà masla adàvə à anu azlatatak anik anik gesina à uwana afà à ahəŋ, kà masla aŋa mav à anu.

23 Baŋa fida la uwana gədehəŋ kà, Zəzagəla la uwana masla masəlay, adaha à gi seriya à gəl, à baŋa fida gəpəhay. Kà mana à uwana gədada à awtày à Korintiya aw mi, kagodaw takay? Kà uwana agayŋa gədada à awtày kà, naka gəbasakullan aw. 24 Kà uwana asa à anu aŋa maf leri à madiŋal gəl à vok aŋkul à gəl aw, ndzer katsizlaw kà à madiŋal gəl à vok à afik haday. Ama asa à anu mədàh sləray anina kà akul aŋa mabəz namnam la ləv aŋkul la tsəh.

2

1 Kà uwaga à uwana gəyàh kà mad à awtày à slaka aŋkul, kà matazakulla iyaw tugwi à adi aya

aw. ² Baŋa gədatazakulla iyaw tugwi à adi kà, gi babay kà iyaw tugwi adataz à gi à adi suwaŋ, kiya uwaga kà, dza la ahəŋ adadzərədfgəla aya aw, kà uwana akul gesina akul la iyaw tugwi la adi. ³ Kà uwaga à uwana gətsetser à akul bokuba uwana gədfahəŋ. Uwana asa à gi mad à awtày à slaka aŋkul la kaslà uwatà, awkà naka iyaw tugwi ataz à gi à adi kà akul. Tsa naka akul la uwana karabaw gi, la dziriga, uwana gəfà madzugway gulo à afik gesina, kà uwana gəsəl kà baŋa gi la marabay la abà kà, akul gesina babay kà akul la marabay la abà. ⁴ Iyay, wakità gulo uwatà kà, gətsetser kà la iyaw tugwi la adi mənŋa, la matərəbay mənŋa, ləv aza à gi kaykay. Ama gətsetser kà, kà matazakulla iyaw tugwi à adi aw. Kəla kà, kà akul aŋa masəlay kà gəwoya akul kaykay.

Mamatsiŋ à masla mađàh mawisiga ala

⁵ Baŋa dza abək mazaw la gəl à azladza kà, abək mazaw la gəl kà à gi aw, ama à akul gesina, awma az à azladza anik anik la tataka aŋkul la abà. Ama asa à gi aŋa mapəh uwaga mənŋa aw. ⁶ Gay mənŋa aŋkul, tafahalla seriya à gəl kiya uwaga kà diga adagay. ⁷ Lagonay kà, say kamatsawwalla kà taslawla gay à ahəŋ kà ləv aŋa mavalal à gay aw, kà masak tetəvi la tsəh aw. ⁸ Kà uwaga à uwana, kamkam gəgod à akul kà: Pəhəwwalla mawoy vok aŋkul! ⁹ Uwana gətsetser à akul kà, kà akul aŋa masəl dziriga aŋha, kà gi aŋa masəlay à baŋa kakəsaw gay gulo aŋa tetuwa. ¹⁰ Baŋa akul kadamatsawwaŋ à zil uwaga ala kà, gi babay gədàmatsalaŋ ala

suwan, -à banja gi la gay aña mamatsin ala- la dziriga, gəmətsallan ala la dziriga, kà madegolay akul, uwana la huma aña Sufəl Yesu Kristu. ¹¹ Kà seteni aña makədfasl anu aw, kà uwana məsəl kà, la azladabaray anik anik gesina.

Pol apəh gay lakəl aña madz à ahəŋ aŋha la Tərowas

¹² Gətsizlla ala la abatà kà mad à Tərowas, kà maz gay marabəŋ lakəl aña Yesu Kristu. Mok uwana gəbəzà à abatà kà, gənəŋəŋ kà Sufəl Yesu adafahgəŋ tetəvi à ahəŋ, kà maz gay marabəŋ.

¹³ Ama la abatà kà, gədzà à ahəŋ la titi aw, kà uwana gəbəzà Titus la abatà aw. Kà uwaga à uwana: 'Mad aŋulo', gəgòd à azlaməna madinjal gəl à vok la abatà, ŋgaha gəhəd à kutso Make-duniya.

Maduwiŋ la Yesu Kristu

¹⁴ Kiya uwaga mazləbay agay la Sufəl Zəzagəla, kà uwana masla adàla anu à maday aña maduwiŋ aŋha à abà, ŋgaha kikay kà maham gay à vok gami la Kristu la abà, kà uwaga abək anu à sləray aŋha à abà, kà anu aña mapàhla gay lakəl aña Kristu ala, la azlaslaka gesina. Masəlay aŋha adahən gudəŋ à vok ala bokuba tatak uwana slaslərta azinay.

¹⁵ Mədagay bokuba tatak mazinay gə uwana slaslərta, Kristu adakədf à Zəzagəla. Slaslərta aday à slaka azladza la tetəvi aña mabəlay la tsəh, azladza uwana atà la tetəvi aña mazila la tsəh gesina. ¹⁶ Kà aña azladza uwana Zəzagəla adabəl atà kà, slaslərta uwaga kà delga, tabəzà sifa uwana adəv à gay aw la abà. Ama kà aña

azladza uwana tazàhla kà, slaslørna uwaga kà delga aw, atsa à atà ala kà mamətsay à waŋ. Lagwa ma uwa à uwana asla kà aŋa sləray uwaga uwa? ¹⁷ Azladza aŋuvaw tanərəz gay Zəzagəla kà bokuba tatak matsakalay, uwana tabəza riba la abà, ama anu kà kiya uwaga aw. Kà uwana Zəzagəla la uwana asləl anu aŋa mapəhay kà la ləv tekula la huma aŋha, kà uwana anu mədahama gay à vok la Kristu la abà.

3

Makəs vok slawda mawga

¹ Lagwa ma mədzəka mazləb gəl gami takay? Awma mənəkudə bokuba azladza anik uwana tapəhakulla wakitə aŋa sayda, uwana apəhla dza ala ay, awma məbəz tsəhay gə uwaga la slaka aŋkul dadəŋ takay? ² Akul la gəl aŋkul la uwana kadapakaw azlawakitə sayda gami, uwana matsetseray gə la ləv gami la tsəh, ŋgaha kà azladza gesina aŋa masəl madz à ahəŋ gami gesina la Sufəl la abà. ³ Iyay, uwaga kà adzad ala kà, akul la uwana akul azlawakitə gami, uwana Kristu atsetsèr à ləv gami à tsəh, ŋgaha aslèlla anu. Atsetsèr uwaga la tatak matsetseray aw, ama la Masasəfok aŋa Zəzagəla uwana la sifa. Atsetsèr uwaga à akur kəslatsats gə à adi aw, ama à ləv aŋa azladza à tsəh.*

⁴ Məpəh uwaga kà, kà uwana məgədaŋ à afik la huma Zəzagəla kà madegolay Yesu Kristu. ⁵ Haday, kà anu la gəl gami kà, məsla kà madəh

* 3:3 3.3 2Musa 24.12

sləray uwanay aw, kà uwana maslay gami gesina kà, atsà à wan̄ kà la slaka Zəzagəla. ⁶ Kà uwana masla la uwana avà à anu maslay kà mapəhla ala makəs vok slawda mawga aṅha ala la slaka gesina. Uwaga agəf̄ kà à mapəhay uwana à afik tatsetsèr aw, ama à Masasəfok aṅha à afik, kà uwana mapəhay uwana tatsetsèr kà adàla dza kà à mamətsay, ama Masasəfok kà adala dza à sifa à abà.

⁷ Uwarà kà, tatsetserəh mapəhay kà à akur kəslatsats gà à adi, la mok uwana adəhəhəṅ uwaga kà, azladza tanaṅà mazləbay aṅha kà, uɟaka aṅha à uwana audà huɟ adi aṅa Musa ala, kà uɟaka uwatà kà, azla Isərayel taslala vok aṅa manərəz huɟ adi aṅha aw, kà uwana aṅərəzl atà à adi. Tekedika kà, uɟaka uwatà asəf̄ aw. Mapəhay kà adàla azladza kà à mamətsay à abà. Baṅa mapəhay uwaga adàla azladza à mamətsay à abà, apəhla à mazləbay məṅga aṅa Zəzagəla kà à azladza ala, à mok uwana adapəhla vok ala.✧ ⁸ Adaməraka sləray aṅa Masasəfok, uwana adala dza à sifa à abà takay, masla adəpəlla mazləbay uwana ala aduwa uwanay gesina. ⁹ Mapəhay kà, asal kà Zəzagəla akəs azladza la seriya. Tsa baṅa tatak uwaga adàla anu à seriya, la uwana apəhanula mazləbay aṅa Zəzagəla, ma adaməraka makəs vok slawda mawga, uwana agəṅ anu dziriga la huma aṅa Zəzagəla ay, apəhanula mazləbay aṅa Zəzagəla, uwana aduwa uwana gesina aw takay? ¹⁰ Mazləbay aṅa mapəhay maviya gà kà ndzəɟa aṅha la ahəṅ aya aw, kà uwana

✧ 3:7 3.7 2Musa 34.29

mazləbəy anja mapəhay mawga adapəhla vok ala, uwana aduwa anja maviyaga. ¹¹ La dziriga kà, makəs vok slawda maviyaga kà, Zəzagəla avà kà anja kaslâ ηuv pəra, à uwana apəhla mazləbəy anja ala. Tsa baņa kiya uwaga zlà ma, makəs vok slawda mawga, uwana adza à ahəŋ anja koksikoksi ma aduwan aw ay?

¹² Məpəhay la dazuwaya la huma azladza gesina, kà uwana məfa manewəŋ gami à azla-tatak uwanay à afik kà, uwaga kà dziriga. ¹³ Anu kà mədehəŋ bokuba anja Musa, uwana ahadà hudf adi anja à ahəŋ la gabaga, kà azla Isərayel anja manəŋ madəv à gay anja mawutsəday la hudf adi anja aw. ¹⁴ Bə haŋkəli anjatà kà aslala vok kà matsənəŋ aw. Baņa tadzəŋ gay anja makəs vok slawda maviyaga kà, gabaga uwatà atsək atà à ama tsərəh à lakana. Uwaga kà, adəv à gay aw, say baņa tagola vok à slaka Kristu. ¹⁵ Bə tsərəh à lakana babay, baməraka mbaw, uwana tadzəŋ mapəhay anja Musa kà, tatsənəŋ aw, kiya gabaga uwatà adzakàhà atà à haŋkəli anjatà à ama. ¹⁶ Ama baməraka mbaw, baņa dza apəh gay la ləv ala, atsà à wan à slaka Sufəl kà, gabaga uwaga adəv à gay la adi anja. ✧ ¹⁷ Kà uwana kà Sufəl Kristu, kà atà tekula la slaka gə, la kətsaw tekula la abà, la Masasəđok Zəzagəla. La slaka uwana Masasəđok anja Sufəl la ahəŋ kà, azladza uwana la abatà kà, atà la makor gəl la abà, awkà azlamayà aya aw. ¹⁸ Hadfay, anu gesina uwana mədiŋ gəl à masla à vok kà, məwadf gabaga uwaga à adi aw. Mənəŋ mazləbəy

✧ 3:16 3.16 2Musa 34.34

aŋa Sufəl Yesu, ŋgaha mazləbay uwaga abəɗla anu koksikoksi tsəràh à uwana məgay bokuba masla. Sufəl la uwana adàh sləray uwanay la Masasəɗok aŋha tsikaslaga.

4

Anu kà anu azlagubgub, ama Zəzagəla kà, masla ndzəɗa

¹ Kà uwaga kà møy vok aw, kà uwana la dziriga aŋa vok mahamay aŋha, la uwana avà anu sləray uwanay. ² Məɗakweska sləray à gəl la ziruwɪ gà gesina; məɗàh sləray la demɗem, məgola gay Zəzagəla babay aw. Ama məpəhla godega aŋa dziriga aŋha ala, kà kəla uwabeyuwɪ uwana av ləv aŋha à Zəzagəla kà, adàgəɗ anu à afik. ³ Azladza anik kà, tatsənà gay marabəŋ uwanay məzàtəŋ aw. Kiya gabaga atsakà atà à yewdi à ama. Səlàw kà, uwaga kà, kà aŋa azlauwana la tetəvi aŋa mazila la tsəh. ⁴ Atà kà, seteni sufəl aŋa gudəŋ à vok uwanay, adaguləfàh atà ala la madzugway aŋatà la abà, ŋgaha kà atà aŋa makəs uɗaka uwana auɗay lakəl aŋatà aw. Uɗaka uwaga kà, apəhla kà mazləbay aŋa Kristu ala. La Kristu la abà kà, Zəzagəla apəhla vok ala. ⁵ Məpəhay kà gay aŋa aslasl gəl gami aw, say gay aŋa Yesu Kristu. Masla la uwana Sufəl, anu kà, anu kà azlaməna maɗahal à akul sləray, kà madegolay Yesu Kristu. ⁶ Mok uwana Zəzagəla adàhà gudəŋ à vok kà, agòɗ kà: “Uɗaka apaka vok, aza mələs ala.” Bà Zəzagəla gà la uwaga, asàk uɗaka aŋha aŋa mauday la ləv gami la tsəh bay. Uɗaka uwaga

apèhanula mazlèbay aṇa Zèzagèla la huḍ adi aṇa Yesu Kristu.

⁷ Anu kà bokuba anu azlamasik abisl deydayga pèra, ama tatak dzèba aṇha sèla aw gà uwaga kà, aga la anu la abà. Uwaga apèhla ala kà maslay mənḡa, uwaga atsà à waṇ kà la slaka aṇha, awkà la slaka gami aw. ⁸ Məs ḡərpa anik anik, ama taḍuw anu aw, ḡəl akàḍ anu à vok, ama mèbas lèv. ⁹ Azladza tatèrèḅ anu, ama Zèzagèla asakànula à ahàl la tsèh ala aw, tasèpèràh anu la vèḍah, ama takàḍanula aw. ¹⁰ Koksikoksi kà mokfak aṇa mamètsay aṇa Yesu uwana amèts kà, aga la anu la vok, ḡgaha sifa aṇha aṇa mapèhla vok ala la anu la abà la dziriga. ¹¹ La madz à ahəṇ gami la abà gesina kà, anu la zlamtsa aṇa mamètsay aga anu la vok, kà uwana mənəfa Yesu. Vok gami kà guḅguḅ, ama məmètsay dadəṇ aw, ḡgaha uwaga la uwana apèhla à azladza ala kà, Yesu la ahəṇ la sifa. ¹² Uwaga asal magoḍay kà mamètsay aṇa Yesu aḍahà sləray la anu la abà, ama sifa aṇha aḍàh sləray la akul la abà.

¹³ Tatsetsèr à wakità Zèzagèla à abà, agòḍ kà: 'Gəḍiṇ ḡəl à Sufəl Zèzagèla à vok, kà uwaga à uwana ḡəpəh gay marabəṇ!'☆
Məḍiṇ ḡəl à Zèzagèla à vok babay kà, kità anu babay kà maz gay marabəṇ. ¹⁴ Məsəl kà Zèzagèla awùlla Sufəl Yesu Kristu à uda la mamètsay, adəwulla anu à uda babay, kà uwana məḍagay tekula la Yesu. Masla la uwana adəpèhla anu ala la huma aṇa Zèzagèla la ḡəl

☆ **4:13** 4.13 Mahabay 116.10

aŋha. ¹⁵ Uwaga gesina kà adapaka vok kà aŋkul, ŋgaha vok mahamay aŋa Zəzagəla aŋa mabəz à slaka azladza gesina, ŋgaha kà matugway aŋa azladza aŋa mazala vok à gəl kayak. Kiya uwaga à uwana, azlauwana 'Kikay', tagodəy à Zəzagəla, tasləkaw masla aŋa mazingəy.

Madza à ahəŋ la madiŋal gəl à vok la abà

¹⁶ Kà uwaga à uwana madzugway gami aruw vok à ahəŋ aw. Məsəl kà vok gami kà agogolay la ŋuv ŋuv, ama sifa uwana Zəzagəla avà à anu kà, aday kəla mavakay la anu la abà. ¹⁷ La dziriga kà, ŋgərpa uwana lagonay kà, adədəv à gay vərđi anik, uwanay kà aŋa disa pəra. La lig aŋa azlaŋgərpa uwaga la ahəŋ kà, adəđah anu à mazləbay məŋga uwana à ahəŋ, uwana adədəv à gay aw kà madegolay azlaŋgərpa uwanay. Mazləbay uwaga kà, aduwa tatak gesina. Baŋa mədzugway lakəl aŋa mazləbay uwatà kà, ŋgərpa kà bokuba tatak deyday la gay yewdi gami. ¹⁸ Məfa madzugway gami à azlatatak aŋa vədah uwanay à gəl aw, azlatatak uwana mənəŋà atà la vədah kà, tadədzà à ahəŋ aw, ama azlauwana mənəŋa atà aw kà, atà la uwana tadədzà à ahəŋ aŋa koksikoksi.

5

¹ Məsəl kà, baŋa gày gami aŋa lakana, uwana vok kutso adəkəl à ahəŋ kà, gày gami anik la ahəŋ la zagəla uwana Zəzagəla la gəl aŋha la uwana aŋəl. Gày uwatà kà adədzà à ahəŋ aŋa koksikoksi. ² Mok uwana la gudəŋ uwanay la vok kà, məbas vok la madzugway la abà,

mətuw à gày gami uwatà à tsəh kà mad à agu la zagəla. ³ Baŋa mədàbəza vok mawga kà, ŋgaha masasəfok gami auguzahay kokudà sləb vok aw. ⁴ Mok uwana mədza à ahəŋ la vok kutso aləg anu la vok kà mətərəbay, məbas vok, kà huma à gay asà à anu vok uwanay aw, ama asà à anu, kà avà à anu vok mawga, ŋgaha kà vok mawga uwaga adugw vok maviyaga à gay. ⁵ Zəzagəla la uwana adəh sləray la anu la abà la gəl aŋha kà uwaga aŋa mapak vok kiya uwanay, avà à anu Masasəfok tsikaslaga aŋha kà mapəh à anu à vok à abà kà, adəfah dzəba aŋha səla aw aŋha uwana apəh à ahəŋ.

⁶ Kà uwaga à uwana, anu məruiw vok à ahəŋ aw. Məsəl kà mok uwana anu la sləb vok uwanay la abà dadəŋ kà, anu kərkər la Sufəl Zəzagəla. ⁷ Məslala vok aŋa manəŋ masla dadəŋ aw, ama mēda à huma à gay kà la madiŋal gəl à vok. ⁸ Ama mədahənla la mabəlafə, ŋgaha asa à anu masak sləb vok uwanay à ahəŋ, kà mad à madz à ahəŋ nekwa la Zəzagəla. ⁹ Ama teraŋa dadəŋ kà, asà à anu kà məkəsəl à gəl, amiyaka mədàgəy la abanay amiyaka mədàgəy la slaka aŋha. ¹⁰ Kà uwana uwaga kà leri gami, kà anu aŋa magay la huma aŋa Kristu, kà madəhla à anu seriya à gəl, kà kəla uwabeyuwi aŋa mabəz humà masik aŋha, lakəl aŋa uwana adəhəŋ gesina, adagay mawisiga, adagay delga, à mok uwana agà la vok uwanay la abà.

Kristu la uwana asəlla anu vok la Zəzagəla

¹¹ Kà uwaga kà, məhoy guba aŋa Sufəl Zəzagəla, ŋgaha məyah mabəz azladza à tsəh,

la gay dziriga uwanay mēzàtàn babay. La paraka kà, Zəzagəla asəl anu, ŋgaha gədzugw kà, bə akul la madzugway aŋkul kà, kasəlaw anu babay. ¹² Asà à anu məzləb gəl gami la huma aŋkul aw. Asa à anu kà katsənaw godega aŋa tatak uwana asa à akul masləkawla anu, ŋgaha kà akul aŋa mawulla à azlauwana tadzidziŋ akul, la tatak uwana la vok tanəŋəŋ la uda gə, awkà uwana la ləv la tsəh aw. ¹³ Uwana anu azlakusoŋu, kagodfaw kà, kà uwana mədavà vok gami à Zəzagəla. Ama anu azlakusoŋu aw, kà uwana asà à anu mazlak akul pəra. ¹⁴ Kristu apəhanula masal aŋha, masal uwaga kà lakəl aŋa sləray gami gesina. La dziriga kà, baŋa dza aməts kà ahəl aŋa azladza gesina kà, ¹⁵ gesina aŋatà kà tagahay kà bokuba azlamamatsay gə. Aməts kà, kà aŋatà, kiya uwaga atà takor sifa la gəl aŋatà aya aw. Ama tadza à ahəŋ la sifa kà, kà ahəl aŋha, aməts babay kà aŋatà, awùl à uda la mamətsay bay kà aŋatà.

¹⁶ Tsa baŋa kiya uwanay kà, məkàsàni dza makasay la manərəzay hudf adi aya zlà ma aw. Uwarà kà, məpakà Kristu ala kà kiya uwaga, ama lagonay kà, mədahəŋ kiya uwatà aya aw. ¹⁷ Baŋa dza la Kristu la abà kà, adapakay maŋalay mawga, madfehəŋ maviyaga adada à lig, dèwdèw tatak adapaka mawga. ¹⁸ Tatak uwaga gesina kà, atsà à waŋ kà la slaka Zəzagəla, uwana asəlla anu vok la Kristu la abà la masla. Avà à anu sləray à ahəl, kà anu aŋa madla à azladza anik à masəlla atà vok à abà la masla. ¹⁹ Bokuba magodfay kà: Zəzagəla asləl Kristu à waŋ, kà masəlla anu à vok, anu azladza gesina,

la masla. Atugw tsakana aṅatà aya aw. Afà anu sləray matsidəyga uwanay à ahàl kà maziṅ à azladza.

²⁰ Kà uwaga à uwana mədapakah azlaməna masləlay aṅa Kristu. Zəzagəla azàl azladza la magoy la paṅaw gami la awtəy. Kamkam, mədəv akul kuḍa, la sləm aṅa Yesu Kristu: ‘Kəsəw makəs vok slawda, uwana Zəzagəla adehəṅ la akul!’ ²¹ Kristu kà adahəṅ tsakana tetuwa aw. Ama Zəzagəla adükwla tsakana gami à gəl gesina, kà anu aṅa mabəz vok mahamay la maham gay à vok la Kristu, la uwana Zəzagəla agəṅ anu azladziriga.

6

Sləray aṅa Pol

¹ Iyay, anu kà anu azlaməna madəh sləray la Zəzagəla, lagwa kà məgod à akul kà: ‘Kabəzəw vok mahamay aṅa Zəzagəla, ama dəhəw haṅkəli kà uwaga aṅa matəfa kà akul aw.’ ² Tatsetsèr à wakitə Zəzagəla à abà, agòḍ à tsəhay aṅha kà: ‘Mok uwana kaslà adaslay kà, gi aṅa madəh delga à azladza kà, gətsəb à ka sləm, ṅgaha la mok uwana kaslà asla kà, mabəl azladza kà gəzlak à ka.’[☆]

Azladeda, lagonay la uwana kaslà uwana asà à Zəzagəla kà madəfa à anu delga, lagonay la uwana asal mabəl azladza.

³ Asa à anu kà dza atsəḍ gay à sləray gami à tsəh aw, kà uwaga à uwana mədəh haṅkəli, kà anu aṅa madəḍ gay à madinjal gəl à vok

☆ 6:2 6.2 Yesayya 49.8

aŋa dza à ahəŋ aw. ⁴ Ama la tatak la abà gesina kà, məpəhla ala, kà anu azlaməna sləray aŋa Zəzagəla. Mədàgay la matərəbay la abà, mədàgay la mazaw la gəl la abà amiyaka azlaŋgərpa taɖuw à anu bay kà, məbasin kiya uwaga pəra. ⁵ Azladza taslahahanula, tawats anu à daŋay, tamaham à anu azladza à gəl. Sləray babay kà aɖuwa anu, vərđi anik babay kà mədzehahal aw, məbaza tetəvi kà mazuw tatak may babay aw. ⁶ Məpəhla uwaga ala, kà anu azlaməna maɖàh sləray aŋa Zəzagəla la ləv tekula, məsəl dziriga, anu azlaməna mabasin, anu azlahayhay. La mazlakay aŋa Masasədok tsikaslaga kà, məwoy azladza anik la ləv tekula. ⁷ La maz sayda dziriga, Zəzagəla avà à anu ndzəɖa aŋha. Maday lela gami kà bokuba kazlaŋa guvəl, uwana məpalla guvəl la huma azlaməna məzam gami, kà mahəlla à ahəŋ. ⁸ Azladza anik tasləkaw anu, ŋgaha azlaanik tapəsew anu babay. Tapəh gay delga lakəl gami, ŋgaha tapəh mawisiga babay aya. Azladza anik tanərəz anu bokuba anu azlaməna fida, baməraka dziriga məpəhay. ⁹ Tanərəz anu kà bokuba tasəl anu aw, ama la dziriga kà, tasəl anu. Tanərəz anu bokuba anu azlamazimnekid, ama anu la sifa. Taslahaŋanula, ama taslala vok aŋa makadānula aw. ¹⁰ Amiyaka mədagay la mazaw la gəl la abà mənŋa kà, məda à huma à gay la marabay. Məkor tatak mənŋa la gudəŋ uwanay la vok aw, ama aŋuvaw məpak azladza ala kà azlagorobu la tetəvi aŋa Zəzagəla la tsəh. Haɖay kà, bokuba məkor tatak aw, ama tatak gesina kà, anu məkoray la huma aŋa Zəzagəla.

¹¹ Akul azla Korintiya, mēpəh à akul uwanay, kà bà la paraka, tatak la ahəŋ məhadəŋ à ahəŋ la tsəh ləv gami aw. ¹² Anu kà məwoy akul la ləv tekula, ama akul la uwana kawoyaw anu aw. ¹³ Gəpəh à akul gay bokuba akul azlabəza gulo: Dahəwnəŋ bokuba uwana məfahakullan suwaŋ, pòkwàw ləv aŋkul la paraka.

Məham gay à vok la azladza à uda aw

¹⁴ Azladza, uwana tasəl Zəzagəla aw kà, ka-hamaw à sləray à abà akul nna aw, maham gay à vok uwaga kà akəsa vok aw. Kakay dziriga aham gay à vok la mawisiga ma? Kakay udfaka aham gay à vok la mələs ma? ¹⁵ Kakay azla Kristu la seteni taslala vok aŋa matsən vok gay la slaka gə ma? Tsa baŋa kità ma, kakay masla madiŋal gəl à vok, atsən vok gay la dza uwana adiŋal gəl à vok aw ma? ¹⁶ Mana ma à uwana aham gay à məŋ gày Zəzagəla, uwana la sifa à vok, la gày mazlazlay ma? La dziriga kà, anu kà, anu azlaməŋ gày aŋa Zəzagəla. Kà uwana Zəzagəla agòd:

'Gədàdza à ahəŋ la tataka aŋatà la abà, gədàgay la atà, gədàgay Zəzagəla aŋatà, tadàgay azladza gulo.'☆

¹⁷ Kà uwaga à uwana Sufəl Zəzagəla agòd à azladza aŋha:

'Sàw à uda la tataka aŋatà la abà, kadzaw à ahəŋ akul la atà nna aw. Katapaw ahəl à tatak àlähga aŋatà, uwana à vok tafehəŋ aw, kiya uwaga kà, gədəkəs akul.

☆ 6:16 6.16 3Musa 26.12

18 Gèdàpaka Baba aṅkul, akul babay kadàpakaw azlakohana gulo la azladègam gulo.¹✧
 Kiya uwaga à uwana Zèzagèla uwana asla à tatak gesina à vok, agòd à atà.

7

¹ Azlamanalay gulo, Zèzagèla apèh à anu tatak uwanay à ahèṅ gesina, kà uwaga kà, mègà gèl gami sètaka, mèbèd tatak uwana à uda, adahànula àlèh à vok. Madzugway gami la abà kà say mègay kà azlasètaka aṅa ndzer, kà uwana mèslèkaw Zèzagèla.

Marabay la mazaw la gèl aṅa Pol

² Wòyàw anu la lèv tekula. Kà uwana mèdadàh à mawisiga à dza anik aṅkul à vok aw, mèdàtsla matekwid à dza anik aṅkul aw, ṅgaha kà mèdapapat tekula aṅkul à bada à abà babay aw. ³ Uwana gèpèh kiya uwaga kà, kà mapuwakulla gudzi à gèl kà makèlakulla ziruwi à gèl, kagodaw aw. Awaṅ, bokuba uwana gègòd à akul kà, mèwoy akul kà aṅuvaw. Tatak la ahèṅ avahanula anina aw. Mèdàmètsay, mèdàgay la sifa kà anu la slaka gà. ⁴ Gènawà akul manaway aw, gi la marabay mèṅga kà akul. Gèdasa ṅgèrpa mèṅga, ama lèv adaval gi à gay aw, bà la uwaga bay kà, gi la marabay mèṅga.

⁵ Uwana asa à gi mapèhay kà, amiyaka mok uwana mèdabèza à Makeduniya kà, mèbèza kaslà kà anu aṅa maduw lèv aw. Mègagamàh la azlaṅgèrpa anik anik uwana tabèzà anu la azlaslaka gesina. Azladza tadzàh kà magazlay,

✧ **6:18** 6.18 2 Samuyel 7.14; Yesayya 43.6; 52.11

ngaha vok gami bay kà adzà à ahəŋ la huyuk huyuk, guba akàs anu. ⁶ Ama Zəzagəla uwana ataslàh gay à azladza uwana à ahəŋ, gəl adàkad atà à vok kà atàsl anu ləv à ahəŋ la mas à waŋ aŋa Titus. ⁷ Mas à waŋ aŋha pəra atàsl anu gay à ahəŋ aw, ama masla la uwana apəh à anu gay madzərəfəhla aŋkul. Masla la uwana apəh à gi kà katàwàw gi à tsəh kà manəŋəŋ gi babay, ngaha bay kà kadzikwàw madəhəŋ aŋkul uwana uwarà, kawàdàw vok à uda, kà mazlak gi babay, uwaga la uwana arəb gi kaykay.

⁸ Gəsəl kà, wakità gulo uwana gətsetsər à akul kà, abək à akul mazaw la gəl la dziriga, naka gədzugway nəma. Ama, dægəd à uwali gəgod aw, kà uwana gəsəl kà gəbək à akul mazaw la gəl la wakità uwatà, kà aŋa kaslà ŋuv. ⁹ Ama lagonay kà, gi la marabay la abà, kà uwana gətsetsər à akul wakità uwaga, gərabay kà, kà uwana gəbək à akul mazaw à gəl aw, gərabay kà, kà uwana katùwàw lakəl aŋa madəhəŋ mawisiga aŋkul, ngaha kà kadapəhaw gay la ləv ala. Mazawla gəl aŋkul kà, apakà kà mawoyəŋ aŋa Zəzagəla, kà akul aŋa mapəh gay la ləv ala, kiya uwaga kà wakità gami adahakulla mawisiga à vok aw. ¹⁰ Kà uwana baŋa anu la mazaw la gəl uwana la abà, asà à Zəzagəla kà, mazaw la gəl uwaga kà adàla anu à mapəh gay la ləv ala à abà, kiya uwaga kà Zəzagəla atəfà dza la tsakana uwana la abà adahəŋ. Tsəhay mazaw la gəl uwaga kà, aza anu aw, ama tsəhay mazaw la gəl aŋa azladza gudəŋ à vok uwanay kà adala dza à mamətsay la huma yewdi aŋa Zəzagəla.

11 Nèṅàw uwana Zəzagəla adfahəṅ la mazaw la gəl aṅkul tsi. Nèṅàw mabədfəla vok aṅkul tsi, nèṅàw maval vok aṅkul la madzugway aṅkul tsi. Lagonay kà, asa à akul mapəhla ala kà kakwesaw kà mawisiga aṅkul kà, kapakàhàw vok ləv à gəl kà akul à akul. Guba adakəs akul kà azlatatak uwana adapaka vok lakəl aṅa uwana naka abəzà akul. Asa à akul manəṅəṅ gi la iyaw tugwi aya, kavàw vok aṅkul kà madəhəṅ uwana asa à Zəzagəla, ṅgaha kadəhàw seriya à mawisiga à gəl, ṅgaha kapəhàwla ala kà kadapallaw ahəl aṅkul la mawisiga la abà.

12 Gətsetser wakità uwanay kà, kà dza uwana adfahà tsakana, baṅaw kà aṅa masla madfəh tsakana magay aw. Ama gətsetser uwanay kà, kà masləhakulla sləm ala, kà mapəhla masəlay aṅkul ala kà kawadaw vok à uda la huma Zəzagəla kà aṅami. 13 Kà uwaga à uwana madəhəṅ akul adzərədfənula.

Iyay, uwana adzərədfənula kaykay kà uwaga pəra aw. Mərəb kaykay kà la manəṅ Titus, uwana agà la marabay, kà uwana akul gesina kà kadzərədfəwla ləv ala. 14 Gətsà zlapay lakəl aṅkul la huma aṅha, akul babay kà kakəlāw à gi ziruwī à gəl aw. Uwana məpəh à akul gesina kà dziriga. Kiya uwaga tatak uwana gətsəlla zlapay la huma aṅa Titus kà, agà dziriga, apakà vok kiya uwaga. 15 Mok uwana adà à awtəy à slaka aṅkul kà, kakəsəw masla la ahəl səla, kasləkəwəw gesina aṅkul, kakəsəw gay aṅha. Baṅa adzugway lakəl aṅa uwaga kà, mawoy akul aṅha kà azalà vok à gəl. 16 Gi la marabay kà akul

kà, kà uwana gənwà akul manaway aw.

8

Mav sili aña azlaməna madiñal gəl à vok la Urusalima

¹ Azladedə, asa à anu mapəhakulla vok mahamay aña Zəzagəla uwana apakà vok la slaka azladza la kutso Makeduniya. ² Madiñal gəl à vok añaatà kà adzəkà vok kà la matap atà aña azlaŋgərpa la afik məŋga, ama bə la uwaga bay kà, tagà la marabay məŋga məŋga, baməraka takor tatak aw babay kà tahamà gay à tatak à vok məŋga. ³ La dziriga kà, tavà bokuba uwana taslala vok. Uwana tavà kà, aduwà à vok; kà uwana tavà kà, kà la mawoyəŋ añaatà. ⁴ Kamkam tagòd à anu, tadəv à anu kudfa kà atà aña mabəz tetəvi aña mad maham gay à vok aña mazlakay à abà babay kà aña azlaməna madiñ gəl à Zəzagəla à vok, la kutso Yahudiya. ⁵ Tatak uwana tahəmla gay à vok kà, aduwà madzugway gami uwana mədzùgw. Teraña dadəŋ kà tavà vok añaatà à Sufəl Yesu, ŋgaha takəs kà anu aña maham gay à vok babay, uwana Zəzagəla ayəh babay. ⁶ Kà uwaga à uwana mədzərədə Titus ala kà maf sləm à sləray uwaga, adzəkà la tataka aŋkul la abà, lagwa masla adadəv sləray uwaga à gay la tataka aŋkul à sləray dzəbə aŋha səla aw uwaga. ⁷ Akul kà kagaw azlagorobu la azlatatak gesina la abà, akul la madiñal gəl à vok, la maslay aña azlagay anik anik, la maslay la mawad vok à uda, ŋgaha la mawoy anu aŋkul.

Asa à anu kà, kà kagaw azlagorobu la sləray uwanay la abà babay.

⁸ Gəpəh à akul uwanay kà, bokuba la leri aw, ama la gay mawad vok à uda aña azladza anik, la uwana asa à gi: Magur sətaka aña masal ankul. ⁹ Kasəlaw vok mahamay aña Sufəl gami Yesu Kristu. Masla kà gorobu, ama akəs magay kudfa kà akul. Uwana adfahà, uwaga apakà gəl aña ala, kà masla kudfa kà, kà akul aña magay azlagorobu la madijal gəl à vok la abà gesina.

¹⁰ Iyay, uwanay gəpəh à akul kà madzugway aña gəl gulo, koksi kà kagaw azlateraņa la sləray aña sili uwaga la abà, lagonay kà. hənàw sləray gə uwana ala. ¹¹ Dahəwwàŋ la marabay uwana kadzaw kəla, bokuba uwana kawadaw vok à uda la madzəka, kiya uwaga babay kà wədəw vok à uda kà madəvla à gay, vəw bokuba uwana ndzəda ankul aslay. ¹² Baņa kawadaw vok ala kà aña mav tatak à Zəzagəla la marabay kà, Zəzagəla akəs mavəy ankul la ahəl səla, bokuba uwana kakoraw kà mavəy. Ama baņa tatak la ahəŋ aw kà, Zəzagəla kà asəl.

¹³ Ama asa à gi aña magodəy kà, kapakahaw azlaməna kudfa magay aw, ŋgaha azladza aña mabəz gəl gəgod aw. Ama asa à gi kà kagaw kalkal gesina. ¹⁴ La kaslā uwanay kà, azlayla vok kazlakaw atà la kudfa aņatà la abà. La huma la gay kà, baņa kadənawkudfa suwaŋ kà, tadəzlak akul. Kiya uwaga la uwana kadəgaw tekula la slaka gə. ¹⁵ Uwaga kà kalkal la uwana tatsetsər à wakità à abà:

'Dza uwana ahəmla gay à vok məŋga kà, aduwa vok aw, ŋgaha dza uwana ahəmla gay à

vok ηuv babay kà aslal.'✧
tatsetsèr.

Titus la azlaslagama aηha

¹⁶ Kikay, mægod à Zəzagəla uwana avà mabəlafə à Titus kà mazlak akul, bokuba uwana məyàh bay. ¹⁷ Titus akəs manavay gami kà mawulay à slaka aηkul. Ama kà uwaga pəra aw, kà mawad vok à uda aηha à uwana akəs mawulay à slaka aηkul la gəl aηha. ¹⁸ Məsləl à awtəy, atà la deda anik à uwana azlaməna madiηal gəl à vok tasəl gesina, kà uwana az gay marabəη la tetəvi aηha, ¹⁹ kà uwaga pəra uwana məsləl à awtəy aw, ama maham à ahəη məna madiηal gəl à vok la uwana akəsàni masla, kà masla aηa mauguzahay anina, la kaslā uwana mədala sili uwanay à Yahudiya. Sləray delga uwaga adəpəhla mazləbay aηa Sufəl Zəzagəla ala, ηgaha adəpəhla ala kà məwoya azladza haday.

²⁰ Haday kà, sili uwana tavà à anu à ahəl kà məηga, say məfal sləm kà azladza aηa matsəd anu gay à tsəh lakəl aηha, la madz à ahəη gami la abà babay aw. ²¹ Asa à anu mafehəη kà uwana delga la huma aηa Sufəl Zəzagəla, ηgaha la huma aηa azladza gesina babay.

²² Məsləl atà deda anik à tsəh aya. Masla kà mədagur mawad vok à uda aηha asik dəη, ηgaha mənəηàη kà masla kà azlaka dza. Lagonay kà, asal mazlak akul aya babay, kà uwana aflə kà gəl à ahəη la akul. ²³ Titus kà, masla kà manalay gulo la sləray la abà, kà masla aηa

✧ **8:15** 8.15 2Musa 16.18

mazlak akul. Ama azladza anik sɛla uwanay tanɛfa Titus à awtày kà, maham à ahɛŋ mɛna gay Zɛzagɛla la uwana taslɛl atà à awtày, kà uwana baŋa azladza tanɛrɛz slɛray aŋkul kà, tazlɛb Zɛzagɛla la Yesu Kristu. ²⁴ Pɛhàw atà ala mawoy atà aŋkul la lɛv tekula, ŋgaha maham à ahɛŋ mɛna gay Zɛzagɛla taslɛl atà à awtày aŋa magɛdɛŋ à afik ndzer, ŋgaha kà atà aŋa masɛlay kà azlayla anu mats zlapay la akul la afik, kà uwana mɛpɛh dziriga.

9

Zɛzagɛla awoya dza uwana avày la lɛv tekula.

¹ La madzugway gulo la bà kà, gay la ahɛŋ aŋa matsetser akul lakɛl aŋa mazlakay, uwana tazlakla azlamɛna madiŋal gɛl à vok la kutso Yahudiya aya aw, kà uwana kasɛlaw uwaga gesina. ² Gɛsɛl kà, akul la gɛl aŋkul babay kà, asà à akul mazlak atà. Lakɛl aŋkul la uwana gɛts zlapay la huma azlamɛna Makeduniya, la magɛdɛl à atà: Azladede la gudɛŋ uwana la kutso Akayya kà, tafàh vok à ahɛŋ kà dagay koxi, kà mazlak azlamɛna madiŋal gɛl à vok la Yahudiya. Mawadɛl vok à uda aŋkul uwaga, kà atsɛnà azladza ala kaykay la tataka aŋatà la abà aya. ³ Lagonay bay kà, gɛslɛl azladede makɛr uwaga à awtày, kà maham gay à tatak à vok, bokuba uwana: ‘Dahàwwàŋ’, gɛgɛdɛl à azladza anik, kà atà aŋa mɛdàbɛza à awtày kà, kà tatak uwana gɛtsà zlapay lakɛl aŋha kà adàpaka vok. ⁴ Agayŋa azlamɛna Makeduniya tanɛfa gi à awtày, ŋgaha mɛbɛza akul à vok kà

kadàcfahaw vok à ahəŋ aw kà naka aŋidz ahama anu à gəl la huma aŋatà, kà uwana məgodf kà mənawa akul manaway aw, tadàh vok à ahəŋ, məgodf kaykayga, ma kakay adàpaka vok la akul ma? Akul babay kà aŋidz adàhama à akul à gəl. ⁵ Gədzùgw dziriga kà, azladede uwaga tatsa vok à awtày à slaka aŋkul, kà tatak gesina uwana à ahəŋ tavà la ləv tekula. Ŋgaha kà, la mok uwana mədàda à awtày tatak uwaga adàcfah vok à ahəŋ lela, kà bà la dziri kà mavày la ləv tekula aŋa dza, awkà la leri aw.

⁶ Gəpəhakulla la gay la gay la abà uwanay: Dza uwana asləkay ŋuv yewdi kà, adàtsəday babay kà ŋuv yewdi, ama dza uwana asləkay mənğa kà, adàtsəday mənğa babay. ⁷ Tsa baŋa kiya uwaga kà, dza avà bokuba uwana ləv aŋha arab kà mavày. Vəw la ləv tekula awkà la leri aw, kà uwana Zəzagəla arabay lakəl aŋa dza, uwana avày la marabay, ŋgaha la ləv tekula. ⁸ Zəzagəla la maslay kà mav à akul tatak gesina, kà akul aŋa məbəz kəla tatak, uwana kanawkuɖa aŋha gesina, ŋgaha atəm akul à ahəl aya aŋa madàhla sləray dzəɖa aŋha səla aw gə kiya uwanay. ⁹ Uwaga kà bokuba uwana tatsetsèr à wakità Zəzagəla à abà:

'Dza delga av tatak à azlaməna kuɖa la ləv tekula. Mawoy dza aŋha kà, aga la ahəŋ koksikoksi.'[☆]

¹⁰ Zəzagəla la uwana masla mav fofulo à masla masləkay, ŋgaha la tatak may aŋa madzadzarla akul. Adavà à akul fofulo gesina uwana kanàwkuɖa aŋha, ahənəŋ kà fofulo masigla,

[☆] 9:9 9.9 Mahabay 112.9

ngaha masəl dza aṅkul aṅa magay mənğa. ¹¹ Adəpis akul gay à vok la tatak gesina la abà kà masəl dza aṅkul, ngaha azladza aṅuvaw aṅa 'Kikay', kà magod' à Zəzagəla, kà sili uwanay kafàw anu à ahàl, mədala. ¹² Ndzer, mavày aṅkul uwanay kà, adàzlaka azladza aṅuvaw la sləray aṅa Zəzagəla la abà. Ama uwana aduwa uwaga kà, 'Kikay', azladza aṅuvaw tadəgod' à Zəzagəla. ¹³ Kà uwana mavày uwanay kà, adəpəhla madz à ahəṅ dziriga aṅkul ala, kiya uwaga kà, azladza tadəsləkaw Sufəl Zəzagəla, kà uwana kakəsaw mapəhay aṅa gay marabəṅ aṅa Yesu Kristu, ngaha tadəsləkaway aya kà masəl dza aṅkul, uwana katsakaw tatak la slaka gə la azladza gesina. ¹⁴ La mok uwana tadənəṅ vok mahamay aṅa Zəzagəla adəgay mənğa lakəl aṅkul kà, tadədəv kudfa kà aṅkul, ngaha tadəwoy akul mənğa. ¹⁵ Lakəl aṅa uwanay gesina kà, 'Kikay', məgod' à Zəzagəla kà mavày aṅha, uwana aduwa vok gesina.

10

Gay uwana Pol awulla

à azlaməna matsəd' gay à mapəhay aṅha à tsəh

¹ Gi Pol la uwana asa à gi mapəh à akul gay aṅa aslasl gəl gulo lagwa, azladza anik kà: 'Gi tələmna à baṅa gi la tataka aṅatà la abà', tagod', ama: 'Gi dzaṅdzaṅ', tagod', 'A baṅa gi kərkər la atà.' Kamkam gədəv à akul kudfa la sləm aṅa Yesu Kristu à masla uwana tələmna, ngaha dziriga. ² Kamkam bədəwla

madzugway aṅkul kadàfaw gi leri à gəl, kà gi aṅa madàpèhla à akul ala ndzèdà gulo à baṅa gèdàda à awtày à slaka aṅkul aw. Kà uwana aṅuvaw azladza la slaka aṅkul tagoɔf kà, gèdàh slèray kà bokuba aṅa dza uwana asèl Zèzagèla aw, tasèl kà, gèsla kà mapèhatàla ndzèdà gulo noma. ³ La dziri kà, anu kà anu azladza asik noma pèra, ama mèpay kiya aṅa azladza asik aw, say la tetèvi aṅa Zèzagèla la tsèh. ⁴ Kà uwana kazlaṅa guvèl uwana mèpala guvèl kà aṅa slèb vok aw. Ama kazlaṅa guvèl aṅa Zèzagèla, uwana la ndzèdà. La masla la uwana mèbazlèhla azlazlagam uwana à ahèṅ, azlamèna mazam aṅa Zèzagèla tahàdàh vok à abà, ṅgaha la azlamadzugway fidaga aṅa azladza gesina. ⁵ Uwana dza atsalla zlapay lakèl aṅa matsihila aṅa Zèzagèla kà, mèdàkwèṅ à ahèṅ gesina, mèdàtsèrkwah azlamadzugway mawisiga aṅa azladza gesina aṅa makès gay aṅa Kristu. ⁶ Anu kà mèdàdàh vok à ahèṅ kà matsèrèkwèh azlauwana takès gay aw, à baṅa akul kà akul azlamèna makès dziriga aṅa Zèzagèla.

⁷ Nèrèzàw dadàṅ tsi. Baṅa dza afa gəl aṅha à azladza aṅa Kristu à adi kà, say adzugway lela kèla zlà, kà uwana anu babay kà, anu azladza aṅa Kristu. ⁸ Ndzer, kà uwana zirui akès gi aw, gèdats zlapay la Sufèl Yesu Kristu kà, kà uwana masla la uwana avà à gi ndzèdà, kà madla akul à huma à gay la madìṅal gəl à vok la abà, awkà kà mazàhakulla aw. ⁹ Ama asa à gi kà kadzugwaw kà gètaw akul la wakità gulo aw,

¹⁰ kà uwana azladza aṅuvaw tagoƒ kà, wakità aṅa Pol kà zlazlada ṅgaha dzaṅdzaṅ. Ama baṅa gəl masla la tataka gami la abà kà, arùw vok à ahəṅ, asəl mapəh gay aw. ¹¹ Dza uwana adzugw kiya uwaga kà, aganay à uwana gəpəhal: Tatak gesina uwana gətsetsèr à akul kà, gədàpəh à akul aya, à mok uwana gədàgay la tataka aṅkul la abà.

¹² La dziriga kà, məslala vok aṅa magazləla gəl gami la azlaməna maziḡən gəl aṅatà, uwana tagur gəl aṅatà kà la aslasl gəl aṅatà aw, uwana tagur gəl aṅatà kà la aslasl gəl aṅatà kà azlakusonu. ¹³ Ama anu kà, məts zlapay kiya uwaga aw, anu kà məduw makwi uwana Zəzagəla akədəv à anu à ahəṅ aw. Abəzla anu à slaka aṅkul la gay marabəṅ aṅa Yesu Kristu, uwaga la uwana makwi aṅa sləray gami. ¹⁴ Baṅa kità kà, məduwla makwi aw, kà uwana la dziriga məbəzàwàṅ kà la tetəvi aṅa gay marabəṅ lakəl aṅa Yesu Kristu. ¹⁵ Ama anu kà, məts zlapay lakəl aṅa azladza anik uwana tadzəkà aw, kà uwana uwaga kà gay gami aw. Ama kəla kà, madzugway gami kà, kadàw à huma à gay la madiṅal gəl à Yesu à vok la abà, ṅgaha kà sləray gami, uwana la tataka aṅkul la abà aṅa mad à huma à gay, la makwi gami uwana la abà Zəzagəla akədəv à anu à ahəṅ babay. ¹⁶ Zlahaw la huma la gay kà, mədàbəza tetəvi kà maz gay marabəṅ à kutso anik, uwana la abà kərkər la akul. Uwaga kà məslala vok aṅa mats zlapay la slaka uwatà aw, kà uwana slaka uwatà adagay guf aṅa dza anik.

¹⁷ Ama bokuba uwanay à uwana tatsetsèr à

wakità Zəzagəla à abà:

'Baṅa dza asal mats zlapay kà, atsa zlapay kà la azlatatak uwana Sufəl adahàn kəla.'[✧]

¹⁸ Iyay ndzer kà, dza agay masəlay gə la huma aṅa Sufəl kà, kà uwana Zəzagəla awoyà masla, awkà la mazləb gəl aṅha la gəl aṅha aw.

11

Pol la azlaməna matapla fida gə

¹ Lagwa kà, asa à gi kà basəwgəṅ, kavàw à gi tetəvi gəbadma ṅuv makusonju kusonju gulo uwatà. La kità kà, kamkam basəwgəṅ. ² Maṅor aza à gi lakəl aṅa akul, azlauwana tavavàr akul bokuba uwana azà à Zəzagəla, kà uwana gədadfa akul mawdfa à ahəṅ la Kristu, ṅgaha asa à gi kà kadzaw à ahəṅ la sətaka, kà gi aṅa mapəhla akul ala, kiya dahalay uwana tavà à zil sətaka. ³ Gi la guba vok la abà, kà uwana gədzugway lakəl aṅkul, kà dza aṅa marəhla akul à uda, kà masak à Yesu Kristu la tsəh ala aw. Dzùgwàw lakəl aṅa uwana bebi asà à waṅ arəhèla Hawwa à uda la demdem aṅha tsi. ⁴ Baṅa masla matapla fidaga anik asà à waṅ à slaka aṅkul, kà mapəhakulla Yesu anik, gərgər la uwana məzəkulàn, ayyà kagodaw. Ama masasəfok uwana apəhay kà uwaga kà, masasəfok Zəzagəla uwana kabəzəwwal uwarà aw, ṅgaha babay kà, azàṅ kà gay marabəṅ uwana kadìṅəwwal gəl à vok aw. Ama bà la uwaga kà katsəbàwwal sləm!

[✧] **10:17** 10.17 Yereimiya 9.24

⁵ La madzugway ankul la abà kà, dza uwanay kà: 'Məŋ dza' kagòdàw, ndzer. Ama la dziriga kà, aduwa gi aw. ⁶ Iyay, zlahaw kà gəsəl mabadma kiya anha aw. Ama kà anja dza hankelega kà, gi la hankeleli, kà uwana asik dən dən, gədapəh à akul uwaga la dazuwaya.

⁷ Dagay uwarà, mok uwana gəzəkulla gay marabən anja Zəzagəla kà, gənàv akul tatak bà nıv babay aw. Gəzığənà gəl aw, kà uwana asa à gi kà akul kazığənàw, gəgod. Nğaha ma uwaga ma, gəfahən ma mawisiga takay? ⁸ Mok uwana gəfàh sləray la tataka ankul la abà kà, gəbazà à tatak uwana gənukudfa anha la slaka anja azladza gudən anik ndzer, gədàla atà à kudfa à abà kà akul. ⁹ Mok uwana gi anina la abà gə kà, gəfà mahanay à dza anik ankul à gəl aw, kà uwana azladedə mənə madijal gəl à vok dagay la Makeduniya tanañah à gi à adi la kudfa gulo la abà, kà uwana asà à gi maf à akul mahanay à gəl aw, bà tsərəh à huma à gay babay kà, asà à gi tetuwa aw. ¹⁰ La dziriga kà, gəgod à akul kà, gi la madəf gay ləv, kà uwana gəfà tatak ankul à gay, ankul uwana la kutso Akayya tetuwa aw. La dziriga kà, fida gəpəh aw, kà uwana Kristu la gi la abà nğaha masla kà fida aw. ¹¹ Kà mana à uwana apəh uwaga mi kagodəw takay? Kà uwana gəwoya akul aw, kagodəw ay? Awan! Zəzagəla kà asəl kà, gəwoya akul la ləv tekula.

¹² Lagonay kà, gəda à huma à gay la madəhən kiya uwaga, kà maham anidz à azlaməna mat-apla fida gə uwaga à gəl, uwana asa à atà mazəb à anu humà ala, la mazləb gəl anjatà,

ɲgaha kà atà aɲa masəlay kà sləray gami kà gərgər la aɲatà. ¹³ Kà uwana atà kà, azlaməna masləlay dziriga aw, azlaməna fida, ɲgaha azlademdem uwana tapàkàh gəl aɲatà ala bokuba azlaməna masləlay dziriga aɲa Kristu. ¹⁴ Uwaga kà nadzipo aw, kà uwana seteni babay kà, apaka gəl aɲha ala kà malika aɲa uɖaka. ¹⁵ Uwaga kà, apaka tatak maval anu ləv à gay aw, à baɲa azlaməna sləray aɲha tagoɖay kà: ‘Anu azlaməna masləlay dziriga’. Ama la vuɖ makəɖ gəl à ahəɲ kà, tadàbəza seriya kəla aɲa sləray aɲatà uwana tafahəɲ.

Pol aɖəɖ gay ləv kà ɲgərpa aɲha

¹⁶ Bà gotənaɲ gəpəhay aya, asa à gi kà dza aɲa manərəz gi bokuba gi kusoɲu aw. Ama baɲa asa à akul kà aɲa mapakgəla kiya kusoɲu, kità zlà kà, fàw à gi à ahəɲ bokuba gi kusoɲu, kà gi aɲa mats zlapay makusoɲu kusoɲu suwaɲ zlà. ¹⁷ La dziriga kà, uwana gəpəh la abanay kà, mapəhay aɲa Sufəl aw. Baɲa gəɖəkəs mats zlapay, gəbadaɖma makusoɲu kusoɲu zlà. ¹⁸ Tsa azladza aɲuvaw tats zlapay kà azlatatak uwana la gudəɲ uwanay la vok kà, tsa kətà gi babay kà, gəts zlapay suwaɲ kiya aɲatà. ¹⁹ ‘Anu kà anu azlaməna hanəkəli’, kagoɖaw, kà uwaga à uwana kabasawwaɲ azlakusoɲu aw ay! ²⁰ Iyay, akul kà kakəsaw kà azladza tafa à akul asik à gəl, bokuba akul azlamayà, tazaw akul à gay tsərəh à aslasl adi, takad à akul demdem à gəl, tapəsew akul ɲgaha tafafa à akul ahəl à gəl, tatərəb akul. ²¹ Haɖay, la dziriga kà, aɲidz ahama gi à gəl kà mapəhay kiya uwaga, ndzer kà, gi guɖguɖ.

Ama lagonay kà, tsa anjdz aham azladza à gəl anja mapəhay makusonju kusonju aw, kà gi babay kà, kità gədəpəhay suwan. ²² Tadagay azla Ibəranənkowen, gi babay kà bà gi atà, tadagay azla Isərayel, gi babay bà gi atà aya, tadagay mayyi à tsəh ala anja Abəraham, gi babay kà bà gi mayyi à tsəh ala anja suwan, ngaha ma taduwa gi ma la mana zlà ma? ²³ ‘Anu azlaməna sləray anja Yesu Kristu’, tagod. Gi babay kà, gədəh sləray anja bay, gədəh sləray uwaga la maduw atà aya. Iyay, uwaga gəpəhay kà, kamkam bokuba gəl à gi la vok aya aw. Ama ndzer kà, gədəh sləray duduwa à atà zewk à zewk, tadaw gi à danay duduwa à atà. Tazlabəh gi duduwa à atà, mamətsay kà gi gəuzuzəhla kà la gay gəl ahəl. ²⁴ Asik zlo azlamasiga anja azla Yahudiya taslahgəla la kurpi, kəla maslahgəla kà, tapəs gi la kurpi dzik makər gəl anja ladəga, ladəga.✧ ²⁵ Asik makər azla Rom tazlab gi la azəva. Tatsəh gi la akur kà makəd gi asik tekula. Asik makər kəslah iyaw aguwəhgəla à gəl à abà aya. Asik tekula gəvək à iyaw à abà gəhən à abà. ²⁶ La mauguzahay gulo uwana la abà, anuvaw kà gəsəh ngərpa la azlamukwà la abà, la ahəl anja azlaməna gəna, la ahəl anja azlatsəhay anik anik, amiyaka bà la ahəl anja tsəhay gulo babay. Gəsəh ngərpa la azlaslaka gesina, la azlahud gudəh gesina la abà, ngaha la ahəl anja azlauwana: ‘Anu azladedə anjak’, tagod à gi, ama kà anja gay gə. ²⁷ Gədəhəh sləray dəgdəgga tsərəh à uwana naka gəməts à abà,

✧ 11:24 11.24 5Musa 25.3

bà madzèhal babay kà, gèdzehàhàl aw. Gèbàz tatak may la tatak masay aw, zweek à zweek gèkas nòlay, anasl akàdàh gi, kà uwana gègàh la vok deyday. ²⁸ Njodègi kà, azlatatak anik anik la ahèŋ babay kà, gèslala vok aŋa matugw uwaga à uda aya aw. Ama tatak tekula la ahèŋ atèrèb gi kèla mavakay: Gi la madzugway la abà kà lakèl aŋa azlamèna madiŋal gèl à vok la kèla maham à ahèŋ mèna gay Zèzagèla, kà masla gè. ²⁹ Magay guɓguɓ aŋa dza kà, apakgèla kà guɓguɓ suwaŋ. Baŋa dza atèf à tsakana à abà kà, lèw aza à gi mèŋga.

³⁰ Azlayla vok kà gèts zlapay, ama kèla kà, gèts zlapay kà lakèl aŋa tatak uwana apèhla guɓguɓ gulo ala. ³¹ La haɗay kà, Zèzagèla Baba aŋa Sufèl gami Yesu Kristu asèl kà gèdàh fida aw, mazlèbay agay kà la masla koksikoksi. ³² Mok uwana gi la Damas kà, lawan aŋa mèŋ sufèl Aretas, abàk azladza à gay gamagày aŋa huɗ gudèŋ gesina, kà atà aŋa makəs gi. ³³ Ama la abatà kà, azladedà anik tafà gi à takosà à abà, tadzilà gi à ahèŋ la gèl zlagam uwana takèsla gay à huɗ gudèŋ à adi. Kiya uwaga la uwana gètèf la ahàl aŋatà.

12

Uwana Sufèl Zèzagèla apèhla à Pol la masesiŋay

¹ Amiyaka bà akèsa vok la slaka azladza aw, babay kà say gèts zlapay kà mapèhay lakèl aŋa tatak uwana Sufèl apèhgèla ŋgaha la azlauwana masesiŋay apèh à gi gesina. ² Gèsèl masla

madıñal gəl à vok anik uwana la Kristu la abà, dagay uwatà kà adadàh mavay kulo gəl aña ufad, masla kà ahàd à zagəla mamakər matsekakaday gə uwatà à afik. (Adà à afik ma la sləb vok kà, à bi masesıñay pəra asasıñla à mənğa kà, gəsəl aw, say Zəzagəla kokuda gəl aña pəra asəl) ³ La dziriga kà, dza uwatà kà ahàd kà à slaka mazləbay uwana à abà la slaka Zəzagəla. (Bi la sləb vok à uwana Sufəl adala masla à abà kà, gəsəl aw, masla masəl uwaga kà say Zəzagəla pəra) ⁴ La abatà la uwana atsanà azlagay nasiriga, uwana azladza taslala vok aña mabədal à tsəh aw, uwaga kà tetəvi la ahəñ kà aña dza la sləb vok aña mapəhay babay aw. ⁵ Lakəl aña dza uwatà la uwana gəts zlapay, awkà la ndzəda aña gəl gulo aw. Kiya uwaga la uwana kà, gəpəhla guɓguɓ gulo ala. ⁶ Baña asa à gi mats zlapay aw, gəhəl à ahəñ kà uwaga, kà uwana asa à gi kà, dza asləkaw gi lakəl aña tatak uwana anəñəñ la uwana atsənəñ la slaka gulo aw.

⁷ Naka azlayla gi gətsa zlapay, kà uwana Zəzagəla apəh à gi azlatatak dzəba aña səla aw gə aņuvaw. Kiya uwaga babay kà avà à gi tatak anik aya, uwana azà à gi, kà gi aña magay zlapay aw. Tatak uwaga kà Zəzagəla agòlla la ahəl aña seteni kà matsàhla gi yəs kà gi aña magay zlapay aw. ⁸ Asik makər gədəv kuda à Sufəl Zəzagəla lakəl aña dıvats uwaga, kà masla aña mapəlgəla la uwaga la abà. ⁹ Ama masla awùlgəla agòd: 'Vok mahamay gulo kà diga kà aņak gesina. Mok uwana kak guɓguɓ kà, ndzəda gulo adahà sləray

la kak la abà.' Lagonay kà, gi la marabay kà mabas guḅguḅ gulo kà uwana ndzəḍa aṇa Kristu la gi la abà. ¹⁰ Kà uwaga à uwana, gəvalàh à zagəla lakəl aṇa guḅguḅ gulo, amiyaka azladza tatsək à gi magoḍahay à gəl, tatərəḅ gi babay kà, gəbasinḡ kà Kristu. Baṇa azlamatərəḅbay anik la mazaw la gəl tawəḍàh gi à ahəṇ kà, la mok uwatà la uwana gəḅəza ndzəḍa.

Madzugway aṇa Pol lakəl aṇa azla Korintiya

¹¹ La dziriga kà, gəpəh kà gay makusonḡ kusonḡ, ama akul la uwana kafaw gi gasa à gəl aṇa mapəhay kiya uwaga. Kà uwana naka akul la uwana katsàw zləḅàw gi, amiyaka bà gədagay tatak aw, babay kà azlaməna masləlay mawga uwaga kà tadūw gi la magay nəma aw. ¹² Sləray uwana apəhla ala kà gi masləlay kà, aḍahàhà vok la tataka aṇkul la abà, gəpəhakulla la mabasinḡ uwana akəḍ gəl à ahəṇ aw, gəḍahàhà azlanadzipo la azlatsəhay tatak anik anik, uwana la ndzəḍa gesina la huma aṇkul. ¹³ Awma tatak anik la ahəṇ gəḍahàṇ à azlaməna masla gay Zəzagəla anik, masla gəḍahàkullàṇ aw takay? 'Vàw gi tatak', gəgodḍ à akul magay aw: 'Basàwgəṇ kamkam!'

¹⁴ Lagwa kà, gəzlàdà à awtày à slaka aṇkul ka mamakər adagay. Baṇa gəḍàda à awtày kà, gəḍàfa à akul mahanay à gəl aw. Akul la uwana gəyàh akul awkà sili aṇkul aw. La haḍay gə kà, azlabəza la uwana tadzadzar baba aw, ama baba la uwana adzadzar azlabəza. ¹⁵ Gi kà la marabay, gəvə à tatak uwana gəkoray gesina, adagay aslasl gəl gulo babay, kà gi aṇa mazlak akul. Lagwa ma

katetuwaw mawoy gi, à kà uwana gəwoya akul kaykay takay?

¹⁶ Gəfa à akul mahanay à gəl aw gadzewi la abà aw. Zlahaw kà, dza gà agod à akul kà, gəfa-hàkulla dēmdēm à vok, la mabəz akul à tsəh, la dabaray agodəy kà, hadəy zlà ma aw. ¹⁷ Azladza gulo uwana gəslàlah atà à awtəy ma, tazawàh akul à uda kəla ay? ¹⁸ Gəsləl Titus la azladedə anik à slaka aŋkul. Lagwa ma, Titus la uwana azùw akul à uda zlà ma ay? Tsa, gəgod kà, anu səla kà mədàh sləray kà tekula, madzugway la manəfay gami kà tsa tekula ma, kakay zlà ma aw gà ma?

¹⁹ Zlahaw dagay uwarà kà akul la madzugway uwaga, ‘Asa à anu matsad gəl gami ala la huma aŋkul’, kagodəw. Awan! Kiya uwaga aw. Məpəh uwaga kà la dziriga aŋə Zəzagəla, kà uwana anu azlaaŋə Kristu. Azladedə gami, uwana məwoya akul uwaga gesina kà, kà uwana asa à anu kazigənaw la madinał gəl à vok la abà. ²⁰ Guba aza à gi kà, kà mok uwana gədàda à awtəy à slaka akul babay, kadənəŋaw gi bokuba uwana kayahaw babay kəla. Guba aza à gi, kà mabəz akul à gəl la magazlay, la maŋor, la mapak ləv, la matsən vok a gay aw, la azlagay wadzaw wadzawga, la azlakaskas, la azlazlapay ŋgaha la azlamasàh gəl anik anik la abà gesina, à uwana asa à gi aw. ²¹ Baŋə gədàda à awtəy kà, asa à gi kà Zəzagəla gulo awulgəla gəl à vədəh, kà gi aŋə matuway lakəl aŋə azlaməna madz à ahəŋ la tsakana la abà, kà uwana, la hadəy gà kà, tapəh gay la ləv ala aw. Tasak tatak mawisiga la tsəh ala aw, tadəh mabila la dèwdèw tatak mawisiga.

13

Gay makəf gəl à ahəŋ, la Ayyi

¹ Mamakər aŋha la uwaga gəda à awtày à slaka aŋkul. Iyay, bokuba uwana tatsetsèr à wakità Zəzagəla à abà kà:

'Kəla dza uwana apuw gudzi kà, say agay la azlaməna sayda səla baŋaw makər.[☆]

² Gay aŋa mapəh à azladza uwana à vok à abà tadəhəŋ tsakana la tataka aŋkul la abà, ŋgaha azlamatəm à ahəŋ gə gesina kà, gəpəh à akul bokuba uwana gəpəh à akul dagay la madzəka à mok, uwana gəgà la slaka akul kà masəla. Baŋa gədàda à awtày kà, gədàdaha à atà seriya à gəl la paraka. ³ Kiya uwaga kadəbəzaw sayda uwana kayahaw. Kasəlaw kà Kristu apəh gay la gi la abà təga aw uwa. Ŋgaha sələw kà, Kristu uwana adəh sləray la tataka aŋkul la abà kà, guɓguɓ aw, ama apəhla maslay aŋha ala la akul la abà. ⁴ La mok uwana tatatəsl à ahəf à adi kà, la mok uwatà kà, agà guɓguɓ. Ama lagwa kà, aga la ahəŋ la sifa kà ndzəda aŋa Zəzagəla. Kà maham gay à vok gami la Kristu, anu bay kà anu azlaguɓguɓ, ama kà maslay aŋha kà anu la sifa bay, ŋgaha la mok uwana mədàda à awtày la slaka aŋkul kà, mədədah sləray la maslay aŋa Zəzagəla.

⁵ Lagonay kà gùrəw gəl aŋkul dən zlə. Akul la madiŋal gəl à vok la abà nəma ay? Say kasəlaw uwaga la aslasl gəl aŋkul: Kasəlaw ma, Yesu Kristu ma aga la akul la abà nəma ay? Tsa baŋa kità aw kà, kazawla. ⁶ Ama la hadəy kà, baŋa

☆ 13:1 13.1 5Musa 17.6; 19.15

akul kagəɖawwanj afik kà kadiɲaw gəl à Yesu à vok kà, gəsəl la dziriga kà, kadàsəlaw kà anu azlaməna masləlay aɲa Kristu haɖay. ⁷ Mədəv kudfa à Zəzagəla kà akul aɲa maɖàh mawisiga aw. ‘Ama məyah magəɖ dziriga gami à afik pəra’, kagodaw aw. Awanj, ama kəla kà, asa à anu kadahawwanj kà say uwana akəs à vok pəra, amiyaka məsla kà maɖàh delga babay aw. ⁸ Anu kà məslala vok aɲa matsak dziriga aɲa Zəzagəla à ama aw, say mədza à ahəɲ kà, kà ahəl aɲha pəra. ⁹ Anu kà, anu la marabay à baɲa anu azlaguɖguɖ, ɲgaha akul la ndzəɖa. Kà uwaga à uwana mədəv kudfa à Zəzagəla, kà masla aɲa mapakakulla kà azlazil. ¹⁰ Wakità uwanay gətsetser kà, la mok uwana gələg mabəz à slaka aɲkul dadəɲ. Kà uwana baɲa gədàda à awtày kà, asa à gi aɲa matsətsəhakulla la gay dzaɲdzaɲga aw. Kà uwana Sufəl Zəzagəla avà à gi ndzəɖa aɲha kà makalàhla akul à vədah aw, ama say kà matsizlla akul ala pəra.

Ayyi

¹¹ Iyay zlà azladede, lagonay kà: ‘Dzàw à ahəɲ wurwur zlà’, gəgodf à akul. ‘Gàw azlamahanay gà la tetəvi aɲa Zəzagəla la tsəh, kəsàw gay gulo uwana gəpəh à akul, tsənàw vok gay, dzàw à ahəɲ la lapiya la abà, kà Zəzagəla uwana awoya dza, ɲgaha avàh lapiya, adza à ahəɲ la akul la abà aɲa tsərəh à awtày!’

¹² Dahàw vok ‘Ayyi’, kà akul à akul, la ləv tekula! ‘Ayyi!’ azlaməna madiɲal gəl à vok la abanay gesina tagodf à akul.

¹³ Vok mahamay aña Sufəl gami Yesu Kristu, la masal aña Zəzagəla, ηgaha la maham gay à vok aña Masasəđok Zəzagəla agay la akul gesina.

**Wakità Zəzagəla Wakitə Anja Makəs Vok
Slawda Mawga (Cameroun)
Matal: Wakitə Zəzagəla Wakitə Anja Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 13 Jul 2024 from source files
dated 29 Jan 2022

03efbf2f-98ca-5534-8610-0be3a8c4b974